





倪小野先生全集

七世孫 繼宗

編

次

賦

雪莊賦

聞人邦允判赤縣事歸遂置身於花石竹木之間不知有官也戊子冬宿於其莊次日冒雪而回若有所得乃賦其事曰有野廣漠天高木落駕言出遊日色黤薄有莊僻野去城數里優游伴奐於焉以止維寒凜凜不勸自飲篝燈的皜草縛就寢於是倚枕擁衾輾轉復惺壁喙棟隙不觸自鳴淒淒冷冷鏗鏗錚錚





如蚊如蠅聽之無憑卽之無形熟而聽之兢兢凌凌  
灑密敲輕如屑其玉如碎其冰橫窻素練移時爛燦  
樹影模糊隱隱紛亂開戶視之則見大雪瀟漫皚皚  
乎焉堆霏霏乎焉散宇宙山川恍然一白而夏乎改  
觀矣瑟瑟慄慄漉漉淡淡肅肅習習殺氣奔突如李  
將軍提兵夜襲風飄雨驟踰塹越域使人不可呼吸  
人銜其枚馬銜其勒乘便擣虛拔淮蔡之叛國聲攪  
鵝鶩羣醜就執而傍援偏輔皆魄喪而骨立疎楊拆  
葦青山側映谿月輝流逝水湍勁有瀟灑如玉太守  
者倚檣危坐冠聳襟正吁吁乎噦噦乎劃然孤嘯自

唱自應緬懷故舊到門罷興捲帆回楫篙工聽命邇  
高人而不見對寒谿之澄靜契我道於不言賞雪宵  
之獨勝少焉扶桑影開朝暎徘徊輕嵐浮靄之中高  
帽短裘如鄭先生者從灞陵橋策蹇踏雪而來其眸  
若瞑其肩若頽揚鞭若有所得鼓瑟若有所推篇長  
響遠節短音哀幽思寄草清興在梅慷慨則歌燕趙  
神仙則咏蓬萊攀八極步上台蓋將駕巨浪而趨壑  
埃夫是三者雪中之奇事真耶非耶或意之所及而  
夢之所協耶或像之所似而景之所接耶是皆不可  
得而知也夫千載之下而遇奇事於千載之上依稀



彷彿不必究論蓋其心閒而趣曠志高而情放則與古今而同狀者也噫

倪小野先生全集

七世孫 繼宗 編次

辭

書陸太常祠壁

春雲淡淡兮春雨霏霏檜柏森鬱兮柳依依蘭爲室  
兮桂爲楣螭蟠豐碑兮耀華詞吾王之澤兮故人之  
思青虬欲下兮江之湄願容與兮歆芳棗右迎神  
聲在俎兮酒在茅滿堂嬉笑兮幽明之交聲樂繁急  
兮維土與匏倏忽以別兮登林梢目渺渺以送兮雲  
霧遙山有月兮江有潮我有慕兮還招右送神



詹司訓孝思卷

南浦有偉人兮剛直而介濟以爽敏兮德日于邁講  
誦六經兮資以聖賢旁通子史兮論說傾川不事矯  
飾兮天性恬淡雅好山水兮探幽遠覽尤篤於孝兮  
惟養其志事苟可從兮不强爲異賑乏恤寡兮乃快  
於心賓朋嬉笑兮暢飲豪吟世有若人兮厥行如古  
障樹頽風兮於世有補嗟嗟夫世兮以用舍爲賢愚  
孰知茲人不科目而與顏閔齊驅以顯晦爲高下孰  
知茲人不卿相而與箕穎同價其出也如麟鳳死圖  
其形久則愈明其生也如芝蘭凋畱其香久則愈揚

陰功不泯兮慶在子孫世世濟美兮神明長存

贈楚尹

孟子曰得乎丘民而爲天子是丘民者天子  
之所由尊崇者也天子而下曰公曰侯曰伯  
曰子男其所由尊崇可知矣今之縣令古之  
子男也有君道焉故臺省之明揚不若田野  
之感慕縉紳之稱譽不若子女之謳歌楚自  
順天寶坻轉尹我邑自簡易煩當道蓋能之  
也下車未久已得丘民之心茲行恐明天子  
畱用幸其來予乃述其心爲之歌曰



雲爲旆兮霞爲旌夾青虬兮車北征雙鳧飄飄兮朝  
玉京雪霜燦燦兮照臣誠天子之屏兮書其名簡其  
心兮拔其英我丘民兮望政成攀轅臥轍兮道路盈  
我侯行兮梅花明我侯來兮楊柳青我侯行兮灘有  
聲我侯來兮江水平我侯來兮春復生公道顯兮怒  
以行賦不煩兮差役輕鷓鴣伏兮鸞鳳鳴酌此姚江  
兮神有靈我侯之德兮江比清

倪小野先生全集

七世孫 繼宗 編次

樂府

古意

武廟欲南巡公同黃鞏連名疏入俱午門外跪五日杖五十是時幾死猶以詩諫也

綠煙縹緲籠朝日雜樹當窻花影密象牀初下強梳  
妝羞舉窻前畫眉筆昨宵夢見畫眉人朝來臨鏡雙  
眉顰金蓮不出洞房裏春風遶檻莓苔新

中宵情未洽舟子忙催別執手各無言飲淚聲嗚咽  
細雨迷曙光煙景蒼茫茫江深潮去急侵曉送君航  
君航隨潮不可住妾心隨潮侍君傍請君試聽江潮



聲聲瀉妾之悲傷

秋江寒落波澄亮芙蓉花發高一丈江心月色上花  
枝但見光輝滿江漾我思美人顏正好秋江一別芙  
蓉老芙蓉開落自年華美人千古情無涯

妾憶出嫁時光華動羣目濟濟神仙班出入瓊瑤閣  
清晨媚顏容對鏡頻膏沐承茲君子懽清選諒無怍  
一朝見疏遠自分妾命薄日理廚之下羣婢同淪落  
且炊復且烹風雨黃昏惡跬步遠華堂晨夕爲君作

箜篌引

河之水兮悍且壯魚龍逆奔不能上舟楫具兮善操

者倏焉失勢倏焉喪公乎公乎龍魚之牙利如戈一  
壺將奈何公乎公乎舟楫尚覆於清波一壺安足多  
河之險兮人共知公乎公乎生長於斯老而不悟實  
我悲公乎公乎夫婦之義生雖不相信死願長相隨

巫山高

湘江不可渡遙望巫山高相思無奈何欲飛無羽毛  
湘江與巫山相思無奈託夢閒巫山之峰何重重飛  
度一峰又一峰十二峰頭路轉賒苦爲雲雨相蔽遮  
雲兮雨兮有時散巫山依舊隔天涯

劉封君挽歌



百花冥冥日杲杲錦鞍照耀都門道兄弟戚友送遠  
遊南國江山馬前好寧知生死有定方回輻慘澹旌  
旗縞仙魂已駕行雲歸白鶴一聲喚秋曉來時春色  
當纖穠歸時草木含淒風來時歌笑滿庭除歸時哭  
聲候城隅南遊雖樂不可復白日不照泉下屋

姑蘇歌

昨過姑蘇城偶有所見而述此嗚呼長民者  
不能示以禮義道其恩愛而風俗之敝一至  
於此吾故粗述其養生送死之不同以感動  
之倘得附吳謳而傳於舟人巷豎之口必有

思其平生之奉而戒子孫以身後事者孝子  
仁人之心或可因之而生矣

湖水澄清山秀明水山照映姑蘇城城中兒女嬌且  
奢臉紅膚白眉髮青四腮鱸魚長腰粳純綿溫麗紗  
羅輕姑蘇服食天下稱如何送死非生平嗟伊生長  
繁華叢一死魂魄隨颺風平生膚肉愛逾玉一畚瓦  
礫波濤中莫言姑蘇山水好死後不得同腐草草木  
腐落還著土游魂無著啼霜曉姑蘇尺土如尺金人  
死不得入土一尺深

懸壁劍



君不見青龍陣裏風雲休英雄已謝平蠻侯古吳爭  
羨高誼酬千金價重君家收特構藏劍室錯鏤銀環  
挂東壁風吹練帶垂不搖一痕秋水月光溢夏窻兀  
坐毛骨寒急雨打瓦江傾湍蒼鱗玉鬣森開張軒楹  
閃電疑離蟠赤身抱泣願俱化恍惚平地窺乾端須  
臾澄霽復幽寂壁閒形影還相看此心直欲獻天子  
佞臣首領安能完

將進酒

將進酒花開時風光照眼桃李枝雕簷高飛白日暮  
銀燭輝輝羅幃垂蓮花漏水頻相催綺筵擊鼓行金

杯極憐歌喉轉新嫩柳隄旭日鶯初弄當此青春不  
劇飲上林寂寞殘花夢方崑山真高士新洋江隔如  
千里安得促席共狂吟夜半白鶴忽飛起諸君飲酒  
莫言止一官崇卑同到死萬鐘五斗各一飽素位行  
之而已耳張吾眸但見春酒如江流長吸不覺鯨魚  
愁諸君飲莫休明日東西各有謀但逢飲者吾之儔

木蘭辭

軍書忽下有爺名擊杼拋機代遠征香夢頻驚金柝  
急弱身翻覺鐵衣輕肝腸激烈揚軍氣鄉里咨嗟羨  
女英十二年來同火伴晨昏動止獨分明



結客少年場

大風起兮雲飛揚  
挺身結客少年場  
黃金散盡無吝色  
白馬騎來生耿光  
江湖落落起黥布  
郡縣攘攘索子房  
莫向人前誇智力  
時來盡化爲侯王

門有萬里客

門前寶馬玉珂聲  
有客遙爲萬里行  
劍影陸離心皎潔  
刺文漫滅氣崢嶸  
黑貂敝後功名就  
白羽揮時議論生  
若箇褰衣從爾往  
青雲夾道與天平

折楊柳

一株楊柳綠含煙  
折取低枝作馬鞭  
露葉垂垂愁不

展風條嫋嫋恨相牽  
肯耽飄蕩如花舞  
願保容顏比樹妍  
舞榭歌樓見春色  
莫忘今日別離邊

白苧辭

白苧裁衣恰稱身  
垂羅舞縠豔華春  
光流蕙葉翻風秀  
色奪梨花映月新  
轉盼揚清時獨立  
含情送意爲誰親  
千秋萬歲君王賞  
願化青雲護紫宸

相逢行

道上相逢雲錦車  
一時貴盛說儂家  
弟兄出入麒麟殿  
房闈栽培芍藥花  
傾蓋語言明義分  
銜杯意氣壓豪華  
要予同躡青雲路  
嘉會蹉跎重自嗟



鬪雞篇

紫陌園觀開錦籠揚翹樹羽濯清風氣衝楚霸髮盡  
豎血戰睢陽心獨雄高步隊前如賈勇長鳴日下似  
矜功龍爭虎鬪干戈地笑付當場劇戲中

白馬篇

白馬聯篇碧玉羈人如騰躍馬如飛風高青海呼鷹  
去雪滿陰山縛虎歸直探河源爭遠利橫驅□□破  
重圍安邊勳業聞天子金印纍纍挂紫衣

陌上桑

採桑陌上是誰妻嫩葉柔條拂面齊腕約銀環凝雪

白鬢垂翠鬣壓雲低踟躕使客還停駕惆悵耕夫亦  
罷犁自分託心元有處東風回首鳥空啼

猛虎行

遊子悲歌猛虎行苦心耿志向誰明抱琴長往戴安  
道持節未歸蘇子卿惡木道傍無好蔭盜泉井上有  
汚名整車肅肅趨時命肯此踟躕阻去程

飲馬長城窟

飲馬長城之窟傍泉聲嗚咽客心傷鞭敲曾苦秦人  
築號令猶嚴漢將防水濁漂流烽燧雨沙浮斑駁  
饑霜封書遠寄秦川婦應重相思夢戰場



古別離

悲莫悲於生別離別離乃在玉關西  
唯看墮淚畱衣袂空羨飛塵趁馬蹄  
芳草色深春夢斷征鴻路杳暮雲低  
男兒勳業成何日心憶歸期未敢提

行路難

篋篋歷亂不須彈且聽人閒行路難  
破山白浪經三峽插地青霄度七盤  
班姬失寵顏無恙田相生嗔酒未闌  
一片太空長注目爲雲爲雨竟無端

採蓮曲

白鷺塘西是妾家朝朝塘下採蓮花  
私憐嬌豔花相

並羞靚招搖葉半遮脈脈片雲含  
雨意盈盈一水隔天涯吳謳越吹情  
無極岸芷汀蘭望轉賒

長安道

長安道上聲喧赫云是新封大國伯  
虎賁舊領殿前軍狗盜陰藏門下客  
劍履直入九重門樓臺兼并千人宅  
漫令禽鳥被光榮未離襁褓蒙恩澤  
天子之下稱一人天子威福關喜嗔  
白日輓回生氣勢青雲提上合緣因  
仗鉞秉旄奔債帥排門入闥通錢神  
八騶霧擁羆熊士千騎星馳犀象珍  
車裝擔負如流水日日輪歸權幸里  
積玉堆金堪作山賣官鬻獄真成市



用比泥沙太不經欲如谿壑應無底財雄笑碎珊瑚  
株貨奇預置邯鄲女南苑西山樂未休鑾輿又啓穆  
王遊放鷹大漠頻迷處飲馬長江欲盡流遠道風塵  
飛羽檄夕陽波浪打魚舟滿眼瘡痍勳業地幾人膏  
血宴酣秋古來惡極何可久覆轍相尋前與後兩虎  
共鬪不俱生六龍反正復何有鬼關家爭作笑歌天  
奪魄今集凶咎市曹猶記李斯言關門豈容商鞅走  
我昔長安憾此徒郎當瘦馬避傳呼未醒浮生蕉鹿  
夢又看遺影木驢圖弱子豔姬形偃僕妖腰亂領血  
模糊三族之誅亦慘矣萬死不悟何爲乎

長安路

長安路長安路塵埃十丈如煙霧只恐急雨隨風來  
瘦馬伶行日將暮

新婦歎

妾昔爲新婦入門盛容飾裙繡芙蓉花釵分鳳凰翼  
團扇蛾眉青高髻鴉頭黑蜀錦纏頭宮樣妝吳綾帕  
手銀光色簫韶一派上高樓金蓮步步生嬌羞嫂送  
東城隅姑候南陌頭一時交贈慇懃意紅羅百段相  
疊稠三年下樓來當廚又是小傭新婦時夜隨花燭  
接新婦燭前觀者分妍媸今年接新婦明年接新婦



新婦年年遞歌舞鄰家阿少十三四行爲新婦學妝  
髻學成妝髻休相妒昨日青春今日暮新婦堂前盛  
鉛華舊婦廚前甘布素不知新婦新入門卽是舊婦  
舊來路舅兮姑兮何如心須惜當日千黃金

### 塞北豪

塞北豪黃沙捲雪烏風高錦韉燦爛青驄騎銀光甲  
束緋魚袍出門攬轡橫金刀翻身一箭連雙鷗指揮  
猛士如兒曹長驅萬里清腥臊回頭飛檄聞天朝夜  
臥轅門星斗搖平生一卷龍豹韜贏得形容閣上描  
甘與野燒同枯焦男兒當如塞北豪

### 城東虎

虎在山意氣猛吼如雷獸雄長一朝失脚入東市見  
童瓦礫亂如雨踰牆蹈渠上人牀一箭中目市中死  
嗟嗟猛虎出山林有若雉兔爲人擒身據崇深不早  
悟兒童戲逐當野路

### 姚江竹枝詞二首

姚城東畔大江橋朝夕遙通定海潮郎心那得如潮  
信來往橋邊夕復朝

後橫潭水險如何一過清江數尺波更恐清江橋石  
惡郎舟好趁順潮過



金屏篇

君王妙選入金屏自恨元無婉嬋情點綴綠雲新製  
錦招搖明月坐吹笙吹笙學得神僊曲十二峰頭騎  
白鹿魚龍波浪路漫漫桃李烟霞花簇簇簇簇花開  
經幾春回首雲山憶故秦容顏自有胭脂色還念金  
屏舊伴人

吳航謠

東吳有客船爲家眼前射利爲生涯青年兒女把篙  
櫓紅絲繩映包頭紗姑嫂相逢偶泊處隔船呼喚邀  
喫茶船尾半篷斜日輝倚篷對緝鞋頭麻願言明春

賣買好十錢買朵杭州花

歌風臺

沛宮四顧皆山河罇前起舞風雲歌沛中父老來相  
見上堂重認真龍面沛中子弟拜堂下私言不怕人  
侮我貴極不忘故脚踏茅茨路樂極反成哀涕淚沾  
罇罍三尺出去六龍還至情乃在鄉閭聞歌風臺下  
今荆棘依依草樹風雲色

擬古從軍行

眼前一斗酒坐聽擊筑歌意氣輕沙漠腰劍耀秋波  
明日玉關道匹馬渡西河願屬霍車騎挺身符離過



生縛左賢王馬上橫金戈歸來拜天子封邑不辭多  
紫駟馬

飄飄紫駟馬會上崑崙峰上有長生禾咀嚼無春冬  
雄氣食野虎殊質孕天龍願爲將軍用長推□□鋒

棕葉扇

棕葉裁爲扇團團月樣同直以纖微質奉揚仁惠風  
紈綺休相妒蒲葵頗爾工娟娟素心女持以掩羞容

雄州謠

雨後刈茅草雨前刈茅草茅草長於人刈之何日了  
一刈茅盈把再刈茅盈抱我茅比姑多我力比姑少

短裙不掩脛僕僕塗泥道市頭米價高易飯不能飽

古意

早恨衣工拙誤我千金裘裁縫失時制不得尚衣收  
鸚鵡毛自好慙懃謝白頭

梧桐井

夜半梧桐井轆轤亦停聲妾心如轆轤輾轉到天明

古意二首

悔不當初委此身悔來君意恐非真綵雲影合佳期  
遠白雪歌傳別調新已託虛窻穿幕月甘隨清路上  
衣塵四方有志輕離別豈是當年薄倖人



采石江頭試澣衣妾心對月共光輝琵琶絃上心應  
遠芍藥欄邊事已非鸞影依依秋水鏡貌香香綺  
羅帷春梅賸有凌寒意肯逐東風散漫飛

明妃曲

昭君恃玉顏不肯賂黃金黃金迷世路玉顏冤抑深  
遠嫁同棄置終身抱苦心玉顏一朝埋路邊□人指  
點漢嬋娟青青芳草故鄉色東風歲歲還相憐

楊柳枝

畫眉樓畔舞柔枝烟黛初分淺淡姿轉眼春光逐流  
水東風散亂不如眉

倪小野先生全集

七世孫 繼宗 編次

五言古詩

秋原長老詩卷次李崆峒韻

逢人何落落逢僧一笑開況是能詩僧骨氣無塵埃  
虛堂借我眠燈燭青蓮臺隔座吟哦聲細雪洒江梅  
清瘦韻逾遠天末飄風來攬衣立堂下星露明蒼苔  
欲解錦囊琴入手幾徘徊寫茲林壑音白鶴俄飛回

醉茗

聞醉飲茗醒未聞飲茗醉若人號醉茗此意豈無謂



置身樽罍間糟粕填胸胃人醉百穢生君醉乃滌穢  
清晨淪玉瓶雪鼎浥新翠龍團百和餘清芬鬱蘭桂  
恥與桑落伍價壓金陵貴一椀復一椀便覺睡魔退  
七椀不辭頻長吸東溟費捧來猶不辭病渴若未飫  
盧仝量全窄虛此諫議惠百竅津液生舌底九江味  
頽然紗帽斜坦腹收春媚悠悠何有鄉問我默不對  
千日喚不醒夢揉梅花碎

感梅

伊梅母所植母亡梅還存見梅而問母堂上虛黃昏  
伊梅未開時我意未敢言花開正綽約欲言仍斷魂

珠簾淡雲態玉鏡明月痕花落爲成子樹老惟存根  
冰玉堪比德燦燦枝頭繁折之心惻惻畱以候春溫  
東風忽然至寂寞綠葉園青山日落時伊梅空倚門  
題梁永叔詩稿

壯哉楚竹集音節慨以慷落落江湖心觸手俱成章  
君心近義皇君才薄王楊所以君文章不與時低昂  
大雅今復作合以登明堂

三憶

芝庭武揮使嘗燈夕酌予於園亭又瞰予暇  
攜觴豆過話繼後詩筒不絕嗚呼今物故矣



作三憶以哭之

憶昔元宵月照君庭上花對月酌花下燭影搖絳紗  
此月近元宵與渺天之涯花好共誰折月好酌誰家  
月光隨流水花落更歲華良景往復至人往無回車

二

憶君不可見花下吟窩開望望花日午坐對空樽罍  
樽罍待君酒有詩待我裁白日照階庭一鶴立蒼苔  
我正午夢醒殘雪畱窻梅忽作故人思小車無復回

三

憶昔君好詩和我端午詞薰風動蒲艾我正喜晴時

高枕看浮雲小軒開清池有詩來雙魚慰我長相思  
我思復依依君詩渺難期重閱舊時篇迴見瓊玉姿

題菜

小圃春雨晴百畦長新翠採摘正及時市筐價高貴  
盈盈白玉盤大嚼如未飮濡炙羅前筵但覺無滋味

先月樓

樓前江水環渺渺到天際碧落連淨漪黃昏轉澄霽  
涼生露氣滿光散雲華細鏡匣玉涵空簾鉤銀墮地  
梧葉聲入簷桂樹影搖砌自謂嘉景俱忽憶故人至  
瞻梁見顏容倚欄凝志意書成何處將琴展爲誰試



坐捫遠懷心笑對寒輝臂干戈西營愁杯舉南樓醉  
古人不可期老志由來銳徘徊夜何其歌嘯興還未  
舉目望東洋曙白扶桑樹

水木清華亭爲崑山李元壽賦

積雪耀春陽光生讀書處池漪泛新綠芳葉吐高樹  
樹色共波光染就日成趣小雨潤若膏風送斷烟去  
白鳥點落間叢薄連灑瀨此景迴難言聊著丹青句

食海魚戲作

巨魚長於人厥口豁若谷雙鬢玉又撐秃尾類削木  
清晨上海洲失勢何局促沫流沙水痕入市駭衆目

有客買惠我納以輸廚屋廚人睥睨之礪刀浴其鑊  
老婦憫餘生舉手不忍觸流涎樽俎間閣筯想膏馥  
高呼復狂走始斫几上肉須臾出盆椀臠烹分頭腹  
主人恣大嚼啜濡盆碗覆何當衆客前饒口惟我獨  
春日照簷楹鼓腹對醺醪

贈寫真潘生

我貌具五行於衆固不異反面非其情亦不能嫵媚  
想像生色餘充然瑩以粹槁木蘊神機弗入尋常視  
我徒飽官祿膚肉免憔悴烏紗午日輝海霞分淺醉  
錯落鬚與眉氣宇吐光霽謝君五色筆管度出天意



君實去後圖慚彼兒童記我聞傳神者豈羨形相類  
所貴傳心神厥意乃古遂春雲藹瑤空微風動新翠  
秋月江波平積雪朝曦麗品題縱天豪隨處我神寄  
丹青不我假君亦忘繪事

大車篇二首

大車間且好出門何浩浩陰鞞白銀鐶暢轂黃金轆  
駟服駕長風旄旗映青杲百物旣以備豈不願行早  
恢廓千鍾箱迢遙萬里道惟願至所期年歲未云老  
二

大車間北征道上雞旣鳴趨向極脩廣軌轍循易平

相彼淺收車豈不捷以輕方途兩迷昧忽爾中道傾  
遲速旣以異成敗亦以明駕茲大車者行行重行行

盆草

客從山間來惠我一盆草抱此霜雪姿舊葉類枯槁  
隱隱夜雷鳴一雨朝來攬衣起翫之生意亦微渺  
草木良有知葉葉散光皎

倚牀琴

緬仰古君子意思遠以長豈謂言不能言之弗能彰  
鬼神情幽眇人情反覆所以託諸琴庶以露潛光  
感通徹無碍上下而四旁形骸云在我宛若我心腸



而我或昧迷語我指下腔物我苟俱悟不彈亦何傷  
遠去良不可援之結連牀靜以會其意同遊何有鄉

次韵答方思道二首

相知既以心相報亦以勞清世聯衣冠豈不感逢遭  
當途奮援引各欲假羽毛採芳纈爲佩比子金錯刀  
意氣管與鮑功業蕭與曹慨慷擊筑歌仰視秋旻高

二

李白有天才一官屈夜郎玉石矇世日用舍反其常  
俚音播絲竹昌言指爲狂閨幙羣醜聚蛾眉妒清揚  
夜郎且勿論亦有韓山陽君才韓與李暫落岷山旁

攜手一盼顧懷袖多芳香我歌轉激烈君色無悽愴

秋江

適興與秋宜獨步秋江曲落日芙蓉邊悠悠曉山綠  
雲水道人心風雨漁家宿鱸魚初上時黃花滿茅屋

遠遊篇題畫

壯士懷遠志隱沒誠所羞不封萬里侯當作萬里遊  
黃金買駿馬行賈西定州風高白羽箭雪重青貂裘  
豈不戀衽席遠志良欲讎高貨赴邊急勝覽追前脩  
歸來桑梓里圖畫輝白頭浩歌興百感清響激河流  
醉夢爲李正之題



春花爛熳開春日遲遲影三杯助午醺夢入清虛境  
月照蕙江燈烟破松林暝半掩竹西扉鳥呼猶不醒

徐中甫尹南昌

使君冰玉姿皎然出林壑長風破波濤利器當盤錯  
高名孺子祠勝覽滕王閣長安起雙鳧天南渺寥廓  
王都諫南渠謫惠州用高名千古重於山爲韻  
仙臺何高高下臨千丈濠浮雲忽掩互白日風怒號  
有鳥往從之中天摧羽毛徘徊天際路瞻望心徒勞

二

去惡匪避罪作善匪趨名中心聊自盡豈敢矯物情

陰陽多變態日月恆安行至道久不渝反則當自平

三

朝辭黃金殿暮宿河水邊高車就長阪去去當十千  
四海有知己九重有青天忠信苟不昧旦夕冀返轅

四

變化穹壤間倏忽成今古惠逆理亂樞歷歷如可數  
內明秉先幾外順利安土君獨會厥任厥力豈不武

五

高宴張華堂燭下綺羅擁俠客雜燕趙誰懷萬夫勇  
扶醉躍驂騶爭矜主人寵主寵良亦榮一諾千金重



六

片言結兄弟日夕幸相於入門轉燕婉草草同盤蔬  
推枰論心曲落日明庭除好會難復再此後傷離居

七

三忠祠下路望望白河灣垂楊夾車轍此爲離別關  
行立瞻飛蓋縹緲煙埃閒隕陽不可住暝色城西山

自述

坦坦復徐徐徐徐復坦坦此道本冲虛天地一瀟散  
玄機方自悟去去日便懶憶昔壯遊時遇事氣頗悍  
快心三十年於道逾以遠迷津涉畔岸悔此歲月晚

醴酒始沾脣渴飲腹未滿實薄名遂彰又覺道緣短

題馬侍御伯通秋齋卷

秋光蕩翠屏高人讀書處烟雲淡生姿娟娟弄庭樹  
蘇門鳳凰音秋水芙蓉句風霜一道來淨此炎埃路  
分得者字爲方思道封親題賀

飄飄棠陵子逸才乃天假科名十五年鬱鬱百僚下  
沙河暮月政聲名徹朝野旌薦交臺章聿起行天馬  
封書及雙親五雲綯揮灑四牡歸江南捧此將壽學  
椿光足怡悅恩光照鄉社傷哉久謝萱宰木榮梧櫨  
少慰顯揚私餘事等飄瓦飄飄棠陵子本是逃名者



一朝捧檄心無乃知者寡

陸道巖守楚雄

高才不諧俗大道久湮世豪傑貴知己賢聖阨所忌  
此理古固然況復遭陵替知者炳先幾仁人安厥遇  
侃侃陸夫子表表鏞鐘器小叩未竟音路阻蒼梧帝  
明堂大雅材議者無師摯跼踖三十年部郡聊小試  
晚歲滇南行猥此楚雄寄驂騶失逸步黃鵠飛側翅  
眷爾山水懷曠蕩無涯際萬里爲壯遊子長抱高致  
放浪笑談閒得喪玩爲戲馳騁詞翰場擺落翻清麗  
旁人知者稀我獨解其意長歌代贈言歌罷瞠目視

聞方思道行至金山

棠陵久病客秋風理棹來清狂舊時態隨處錦囊開  
爲愛金山好忘却朝天道坐吸清冷泉行拾蓬萊草  
長歌弔謫仙月落金陵曉而我苦相思燕臺春日遲  
柳條忽轉碧歲月眼前移功業及時就相思復相期

省直

風雨疾復止娟娟素月出苧帳淡清輝佳氣藹虛室  
芳樹垂四簷林泉迴清逸徙倚有所懷欲往路途窒  
虎豹隱北崖竹刺藤稍密忽聞報更吏此意爽然失  
炯炯千里情幽歡隔今夕



歲暮

洪鑪播大化日月無停輪江河漸移徙草木俱謝陳  
矧茲血肉軀焉能久精神所以自強者翼翼求日新  
歲暮冰霜沍落日凝浮塵事功未適會如同棄置人  
攬鏡望前途能不生苦辛

過德州

斜日江水麗秋風林木疎擊鼓催行舟鼓聲落天隅  
天風應呼至篙師發江謳連日舟行澀今既縱所如  
乃知通與塞人力非所須且借月餘輝倚枕理殘書

贈王一寧

幾年不相見形容何落落坐談問起居人事已非昨  
老鶴千里心秋風向寥廓但得老手在龍虎還就縛

百雀圖

羣飛復羣鳴飛鳴各云好栖息亦自安各占一枝小  
凍雪尚未消旭日照林杪物性得其時夢破竹牕曉

贈郭墅東

十年前謁君陳墅草堂暮重逢滄州郡顏面喜如故  
百杯到淋漓一局各超悟薰風蒲艾雨同棹婁江路

出棘竹

以下四首方思道有詩次韻

我愛琅玕枝可延風與月前代六逸翁依之怡曠達



每逢叢生處愛惜不忍伐  
愴此困棘荆久矣委林樾  
方子出棘篇此意先我發  
更恐遺蘖存根株未盡拔  
春風長玉牙慎勿多斲掘

解藤杉

杉木纏未解苦抑石礪濱  
幽谷少經過苦抑誰具陳  
下不徹厚地上不及高旻  
仁人體物意此理如切身  
從茲解脫後化育亦旣勻  
俟以柱廟堂俟以梁天津  
物類惡與良區別原有倫

竈頭桐

嗟嗟竈頭桐何年出霜塢  
良材中琴瑟合爲明堂補

置之八音閒音諧匏與土  
如何久棄寘始遇方好古  
得于竈屋頭偶逢斧斤鼓  
鏗然金石鳴於是乃見取  
秋鴻調正高月白芙蓉浦

榼中鯉

輓彼西江水救此涸轍魚  
望望千里道朝夕俟霑濡  
活此榼中鯉乃見方丈夫  
怡我好生意良可以自娛  
佛氏事放生求福何其愚  
飛而在霄漢沫而在江湖  
萬物皆吾與與之仍在吾

富陽道中

扁舟下桐江江水逾浩蕩  
雲霞石屋深波濤海門壯



神魚挾我舟高駕千重浪三山若可尋羣仙渺相望  
西清書院校諸生

書堂既虛敞重軒復朗明前山拱秀麗曲池還澄清  
白雲挾飛鳥明月出潛鯨我坐堂之上諸生聚羣英  
攷較詩書術敷述天人情案牘暫時謝琴瑟靜處生  
眼前栽培意桃李春風榮

憶南屏山

我憶南屏山湖上晚翠縮春風踏湖船漁樵作遊伴  
萬松秋濤寒曾訪瓊瑤館清霜裁竹冠落日啜茗碗  
爛柯山人來言之趣逾婉令我逸興生却愧官未散

不得壺公術惆悵竹筇短

讀李太白詩信筆

嶺南當五月炎蒸不可驅雨晴片時異炎蒸鬱不舒  
暑毒中病骨苔草生坐隅叫號不自定炎蒸苦何如  
偶觀太白稿疑是神仙書初翫豁雙目光輝溢璠璣  
津津味雋永瓊雪咀嚼餘諷詠移白日心魂與之俱  
清風生兩腋飄若騎蟾蜍蓬萊間風臺去來倏忽踰  
煙藹蒼茫閒庭竹殊蕭疎始知炎蒸毒不到讀書廬

題畫

晴窻日正午聊試題詩筆忽與物情會塵心爽然失



小鳥對鳴時江上秋蕭瑟回首渭川南蘆花映蓬室  
石屋

山行到石屋小坐石屋下天窗漏日光晚景爲我假  
蹤跡喜幽絕毛髮轉瀟洒方子讀書臺我是同遊者

靈隱寺

西湖幾度到始到靈隱寺秋山意與諧寒泉味初試  
却怪飛來峰鑿佛石之崇如何方棠陵處處題名字

雪山

我愛雪中山日華清且麗烟雲淡生姿靄靄浮佳氣  
松柏見餘情蒼翠轉淩厲怡我歲寒心日午凭欄地

明月洞

太古有十日其月不知幾羿射九日落餘月亦應死  
一月落爲石永浸長江水李白醉騎鯨捉之采石底  
今見明月洞頗見太古始

枯桑歎

枯桑殘葉稀新葉將復芽春風吹未發蠶子細如沙  
蠶長葉乃齊葉盡蠶成花蠶絲衣被人桑身無護遮

瀑痕峰

廬山飛瀑峰何人掇其頂掇來轉削拔奇氣猶挺挺  
飛瀑寂無聲白虹迹炯炯風雲一旦移泉源絕天井



螻螳橫如虎直上無所梗  
鸚雀學飛鵬側弄風頭影  
麟蹠石

嗟嗟乎麟兮斃於何歲年  
宣尼忽慟哭化石泰山邊  
雲烟沒頭角四蹄埋黃泉  
洪水洗山壑翻動太古前  
石麟出遺體蹄角猶宛然  
識者鑿其蹄鼓之金聲堅  
攜之遊四方墮落吳山阡  
而我偶題名惻惻心所憐  
贈十六兄

我懷君素知罇前笑不語  
一醉復何辭兩意久相許  
酒呼相如鑪棋博安石墅  
當歡且莫愁聽我歌白苧  
紅梅圖

山中有素女偷食丹砂粒  
東風吹玉面腥紅暈朝日  
却怪傍人眼錯認桃杏質  
不知值雪霰冰肌却寒栗  
是乃造化巧而乃煩畫筆  
此日登堂與醉中一賞識

嬾竹

嗟嗟乎竹兮姿性一何嬾  
其節朗且疎其枝稀復散  
清風不可約雨葉垂垂短  
橫斜四五竿冰霜歲月晚

嬾梅

嗟嗟嬾竹傍嬾梅託其處  
一枝著數花聊點瓊瑤樹  
青子綴柔條薄薄清酸味  
採摘任傍人未謝金鼎御

嬾石



茲石出山壑輾轉藉萬牛廉隅削以利坦然臥林丘  
自甘廢棄餘不願匠氏收野鹿磨蹄角野人厲刀矛  
昔遇王初平叱之不舉頭點化謝仙術頑樸爲我畱  
江潮起渤海涌入東海門江灣幾百轉勢漸殺以分  
初經清江城無以肆騰奔澗涎蛙鮒迹流浪沙礫痕  
聲勢兩俱亡悠悠野水村

嬾潮

嬾野

我抱野人性束縛三十年束縛一解之野人性依然  
置我水石閒梅竹羅我前四物一何嬾我亦與嬾便  
短髮恆不冠不襪赤脚仙揖客不過膝客坐我復眠  
放浪逸我老聊結五嬾緣

擬古

眼底梧桐木云出嶧山岑鳳凰巢其巔蛟龍蟠其陰  
電雷薄蝕餘天潢復浸淫有客攜贈我價薄千黃金  
外膚精細理中抱太古心制爲三尺琴末託清夜吟  
張良

我愛張子房楚楚秦漢英一逢黃石公此道爽然明  
指揮成事業流浪視功名但得神仙意毋勞問死生  
偶過池亭見海棠已謝悵然有述



我愛海棠花臨賞悞花節樹頭浮綠雲樹底飛瓊雪  
良會忽蹉跎芳意易消歇惆悵把酒卮青春一廻別  
夜坐  
中夜亦惕惕披衣水亭坐空林積雨餘月色雲際墮  
紫篠引清風當我襟前過一洗萬古心眼底物機破  
隔壁鼯雷吼詩翁正高臥呼起相與言妙意默而可  
豈徒愛畱連庶以振怠惰

西施菊

越女有西施顏色臙脂奢吳門零落後萬古空年華  
如何好事者乃以名茲花茲花抱寒玉落日明秋霞

末謝歌舞臺畱戀山人家君子受污名臨風幾歎嗟  
丘集齋欽取二首

姚水接滄洲鯨波朝復夕夜坐蓮花亭天青山月白  
援琴一鼓之薰風恣吟繹茲民勞且苦慍解蒙其德  
我倚城北樓聞之重歎息從之識素心欲往路途隔  
二

江上蓮葉舟飛鳧夾雙櫓渺渺白鷗波細細綠楊雨  
文章耀紫霄青雲展儀羽我知君子心忠義乃自許  
愛之不可隨江臯獨延竚

寄沈文明僉事



韶州一相見已謂相見難如何相別後途路兩漫漫  
託根異處所嗟嗟蕙與蘭香氣揚微颺相好同肺肝  
輓史知山少卿

久不見知山知山忽云逝冥逐太陵魂長流杜公涕  
往事玉何瑕遺文錦爲製我憶流觴亭春風吹薜荔

寄魏淺齋御史

堂堂魏御史玉中而鐵面繡衣近日星白筆司雷電  
糾劾準春秋忠勤佐宵旰鷹揚萬仞秋老眼瞻天漢

寄謝汝湖學士

憶君硯池水停蓄千尺深玉堂恣揮灑散作春空霖

餘波沾涸轍復慰渴者心區區衰朽年守拙槁木林  
臨風望飛翰日暮候雲陰

枯梅復花爲陳虞山太守賦

乾坤運元氣賦與恆無偏孤梅抱寒潔吐露元氣先  
槁立敵風雪元氣忽迤邐太守治神明微存變理權  
仁風暢四宇起廢復扶顛播揚拂草木春意潛廻旋  
梅乃君子儔威德尤自然燦燦瓊瑤花完璧如當年

送鄒草陵

鄒生如野鶴獨步何昂藏飄然霄漢思整羽垂復揚  
蟠胷鬱奇氣吐辭搏青蒼赤手掣鯨鯢凌波出呂梁



篆法傳禹穴丹書寶琳琅夏鼎與周鼓落筆森爭強  
豈徒詞翰古復抱古心腸拙言語真晤世務紛縱橫  
公車畱滯久汲引綆須長璠璵定高價榮華候春陽  
周鼎落沉淵杳杳歷年歲錯釜爭時便識者迷茫昧  
一朝輓以出力奪千軍隊蛟龍騰躍閒圖象露魑魅  
乃知古冶心鎔鑄會天粹扣之金石聲餘音皆瓦碎

寄王南渠侍郎

南渠在諫垣才高抱古直時事論要機聲名乃赫奕  
奸權折其鋒君王耳方逆一朝南播遷天風假羽翼

德望台輔間君側正虛席一念懸高堂請之何甚力  
春風看萱花舞衣班繞膝自昔寓京華交道頗云密  
途路限江山思念動晨夕他日復相逢驚心各頭白  
漫興

正月一十日回首觀元旦衣冠各自新禮貌頗不訛  
人事案頭塵天時弦上彈詩橐竟成虛近來語多漫  
復蕭靜庵提學

寄我草堂吟少陵如不死體驗稷契心發揮風雅旨  
史筆落江湖官燈坐風雨烏臺吟嘯餘野亭病應起  
謝惠白芍藥



芍藥一寸根保之如雙玉分期已弗愆生意若可掬  
慎密細微初輪瀉炎蒸毒春風試白花請過野亭曲

謝鄒草陵惠鯉魚

送我雙鯉魚已領素書意亂點桃花鮮細翻柳葉脆  
膏魚憶所歡骨鯁轉餘味波濤忽爾違感歎食欲廢

喜容

我觀舊影圖神真頗盡善不知百年後真否不復辨  
百年只畱名如我星夥燦名有傳不傳傳者亦雜履  
古者避世賢沒世名不見但求吾心安餘事付虛幻  
而我反觀之輾轉多違願片紙托丹青到底終糜爛

謝楊時章種牡丹

名花遠移來根株半生意草亭忽過我謂此莫輕棄  
脫帽把短鉏重培好安置泥翻紫雲香甘泉玉乳漑  
拂拭黃金芽提攜厚防忌移換造化手變理通天地  
吹噓枯朽枝厥功同起廢昔有韓郎湘仙姿混塵世  
能以五彩丹點化鬪新麗草庭學道者乃得神仙戲  
風雨過重陽萬物皆潛闕仁人愛物心自與造化契  
天道慎其初物理窺其細明年三月天且候花小試  
掃石持壺觴賞以清平句

春思



佛小異先生全集  
昨見緋桃花今見海棠樹顏色不尋常光輝照薄暮  
啼鳥弄歌聲宛轉畱春住

小園

小園頗不俗亂石縱而橫點出峰巒意參差插太清  
落日枯桑影髣浮雲生凭几側望閒怡我樂山情

菊圃

聞說南山下秋風菊花圃夾竹欲成籬雜蘭已盈畝  
攜鉏每及晨抱甕頗同古主人好賦詩遠意陶與杜

農憂

稼穡稱艱難艱難下燒阪春風宅不毛夏日雨如汗

雞豚補賦餘鼠雀侵食半藉此爲生謀舍之子孫慢

金線草

草以金線名春風恣吹輾雨絲亂欲紛露珠綴更輓  
縈花映舞裙繡古燕遊輦公子去何長結恨苦柔短

石菖蒲

蒲生脫塵泥臞質含秀潤蟠根與錯節凡卉倂不近  
英英綴露華挺挺含風韻苗裔托嵩巖曾蒙漢武問  
仙標採拔歸封諸天水郡治之如治軍芟疲不少靳  
折腰與焦頭勿雜銛鋒陣

菜畦



菜秧新移栽弱委半貼土秋陽赫過夏勺泉蒸若鹵  
灑灑一夜霖生意回爛腐舊根頗自樹新芽潛欲吐  
況復寒露候幸哉免齧蠱小葉如卷舌大葉欲覆武  
園童荷鋤立暫謝抱甕苦繼繼且日新俟以成佳圃

送鴈峰史太守

君往惠州去過我南雄府陋邦遺敝政入疆動淒楚  
嶺頭文獻祠我詩挂其柱立馬青松下慷慨同弔古  
玩傲故態存或說小野圃書院記西清聊可託樽俎  
乞爲長官告因不廢堂宇惠州播流風於此已可覩  
山城臨蒞初共遵顧公矩補漏復舉偏善政緝舊緒

君是補袞才經畫何其巨翱翔州郡閒所施苦霖雨  
相此嶺外邦民口多雜處人情體恤周赤子尤善撫  
高明多整暇文章有韓杜我昔慕羅浮越境遠且阻  
勝地不可到荒涼昔時庾君能剪秀句百詠已塵腐  
春風拂姚城坐憶梅花午

水亭二首

春色暮亦濃醉倚雕欄畔星明疎竹裏風送落花半  
玉漏夜深沉銀燭影凌亂貪睡怪痴童茶甌費呼喚

二

夜坐水亭空犬吠四隣寂爐香碧繞梁燈影清挂壁



佛心野先生全集 二一  
語話轉綢繆意氣生感激俯仰天地間動靜一游息

登豐山

此山高且險上與霄漢侔石道挂懸崖髣髴飛虹遊  
山童輕以捷步步恣騰蹠而我隨之上不敢輕回眸  
風高動寒凜天闊益偃僂躋攀極分寸詎肯中途休  
不顧瀕顛沛但欲搜怪幽怳怳出寰宇飛步神仙樓  
白雲流其下羣山青萍浮澄江一絲藐綠野文綺綢  
俯見滄海痕只在山麓流長嘯天地中烏輩霜花秋  
荆棘化桑梓壑海沉山丘塊泮幾變易唐晉承漢周  
撐開萬古眼看破萬古愁仙迹宛然在仙人不可求

藥臼對丹爐苔草何疊稠烟光從地起暝色生松楸  
落日萬丈暉倒照寒山頭衣袖映餘光光景爲予留  
風骨尚塵埃歸路披颼颼

輓張蘭齋太守

我走風塵途公掌小司馬階秩方赫然聲名輦轂下  
落魄春風顛接引煩盤學張燈坐羣英歡劇燕乃罷  
潮州二千石誰是攀轅者我父高談翁門庭正瀟洒  
日糴市頭米濁醪鄰家假慙懃媒妁辭痴兒托姻婭  
締戚連右族緣公不棄捨萬里達京華書幣遠惠我  
我自南雄歸公且樂鄉社金紫頗相輝絲竹開鼓瓦



晨夕往返閒肺腑罄輸瀉行看山疊禩坐享海洪嘏  
傷哉骨肉親登堂淚盈把感慕公垂言平生恩不寡  
警策如著龜熏蒸若陶冶聰明究詩書艱難知穡稼  
飄飄飾虛名浪蕩狂風打生死去畱途抱病望霜野  
皮骨倘未空他日拜梧櫬

麥莊

東隴小麥青西隴大麥黃細雨溼柴門鶉鳩鳴野桑  
天際微風來清波搖麥芒田家午炊熟餅餌生馨香  
白首歸來後閒情寄麥莊

送王文哲黃門奉命祭告便道歸省

九五龍飛初百神允穆穆祀望遍羣方斯禮寅以俶  
侍臣將命行於赫秉清肅宵征戴月星花霧溼春服  
亂江踰嶺海所至恆屬屬公事旣竣止親幃問寒燠  
腆潔稱豆觴人閒有餘福豈不眷爾私奔命疾而倏  
吁嗟天壤閒忠孝爲綱軸茲心少自頽俯仰蒙戮辱  
壯哉君之行光輝耀傍目可慕不可隨茲心豈君獨

寄施德成諸友

念茲結交久肝膽照平生一自能語言相呼爲弟兄  
出門卽聚首嬉戲日營營成童入鄉塾朝暮齊課程  
日向成人歲意氣期崢嶸經書事鑽研山房一寒檠



夜雨來雙松連榻談話清後爲餬口計而我東西行  
會短離別長歲月令人驚悠悠冀越路我身羈微名  
鐘鼓長安曉天星縱復橫仰視亦何言飛雁時一聲  
往來極天際我欲隨南征隨之不可得悵快難爲情  
千里龍山夢會面恆分明

聖駕幸太學

聖人立人極厥初垂六經千載旣以邈木鐸聲未停  
皇帝嗣位初萬國咸儀型茲道允得師袞冕賁廟庭  
釋菜稱古禮明德諒惟馨分獻恭承命兩廡生光榮  
贊謁極褒崇聖賢元有靈講幄五雲開儒生園紫青

易書更進講聖道昭日星皇帝嘻曰俞元臣賜坐聽  
元臣再稽首秉心和以屏孰謂唐虞逝明良今適丁  
藹藹文明化四布如風霆草木欣舒華鸚雀潛生翎  
小臣廁班末遭際荷蒼冥

行素

大鵬行天空翼負萬里風嗟吁鸚雀類上下蓬蒿中  
大鷗行渤海沫游隨所在湟潦活鰕魚一勺亦何待  
小大分旣殊所適良不踰矧茲天命似各有合行途  
今觀行素人行行無苦辛殊轍豈足騁所以達吾輪

靜山



山性本至靜靜者故愛山願與山結契托居在山間  
朝看山雲起暮看山雲還雨霽山泉清日麗山花班  
幽尋更高跳萬峰雙屐閒

滌齋爲陳郡博賦

未潔乃假滌吾君潔有素更恐不潔如是以滌爲務  
世氛遠外交天光啓中悟江漢何洋洋望之不可渡  
一曲滄浪歌指君自新路忽解浴沂心樂此青春暮  
吹噓楊柳風呼吸芙蓉露小齋有新篇聊爲進德助

春谷

冰雪未全消山谷春已動花柳弄新妍鶯燕破清夢

名與子真同文重老韓送白雲如可期採摘還相共

題獻葵圖

有序

葵善搏雉兔無逃跨下後王有好獵而國爲  
人□是將以葵獵雉兔卒至身若雉兔爲人  
獵而不自知也余因旅葵之訓而究禽荒之  
禍蓋補聖人慎德之微意聊述詩一章系於

圖末

周王溥威德四彝咸慕義西旅底貢葵實乃德之致  
名公進訓戒謂行宜矜細恐以耳目役反貽盛德累  
有臣能過慮有君先自治所以旅葵書千載傳盛事



後王肆禽荒狎爲較獵戲縱之食人食餓葷不遑視  
牽出郭東門倏忽誇健鷲走搏雉與兔躍馬稱得意  
回首望郊關烽火報□騎一身如雉兔先啗□人餌  
始識古君臣明明炳先知

毘陵王世臣厥祖太常卿東齋厥父承事郎東  
臯而世臣號思東蓋不忘乎先也予故爲之賦  
東齋天下士家學詩禮宗名位聿以起貽謀垂無窮  
偉哉東臯君灑灑振家風源深流自遠實大聲亦洪  
又見思東子言念祖父功欲以誌不忘厥號曰思東  
東齋未寂寞輝光見顏容東臯尚突兀登眺追遺踪

茲念良可嘉德業期日崇

東厓

寄言問東厓東厓今何若初日照空江流水赴大壑  
托迹聊自名會意有真樂極目江雲外相思倚山閣  
克齋

君子貴崇德有要曰在克威愛克允濟剛柔克協極  
溫克以將酒戰克以摧敵處己弗之克人欲滅天則  
處家弗之克恩理多愆忒一念克否開聖狂終異域  
侃侃克齋子克之須努力

答箕篇



林郎中文纘母王氏早寡其父憑箕作詩以  
示之曰寄言與爾無他故節義冰霜不可虛  
卒守終身膺旌典焉

憶昔結髮年辱與君伉儷君身抱明德妾始解中饋  
君旣領鄉書將奮青雲翅妾思逐以飛密效贊助義  
君倏蹶中途妾命危若墜殉歸分乃宜徘徊橫泗涕  
念此一孤兒冀以續君志更謝憑箕靈言盡恩亦至  
冰霜照肺肝節義妾之事君存相勉旃君沒敢忽棄  
辛苦三十年教言時省記小孤幸成立君志獲一試  
溘然長相從存沒諒無媿

蘇節婦

蘇母羅溪上清白比羅溪羅溪長向海不得渾沙泥  
肝腸隨暝路冰雪度春閨歌咏萱堂慶儒林不盡題  
偶爲范秋官廷宜父雜題壽冊

雙松

鬱鬱雙松樹託根南山阿清泉映其側白石夾礫砢  
凡卉更榮謝惟汝未婆娑天邊承湛露青雲百丈柯

蘭巖偶鶴

蘭巖被新翠白鶴雙飛翔栖止巖之畔日夕啄蘭香  
遠韻諧琴瑟清輝皎雪霜教舞青田子霄雲逐鳳凰



萬竹

種德如種竹厥德比竹茂金玉美成林栽培良以厚  
緬懷淇澳風毅哉武公壽霖雨收春風枝枝發餘秀

蟠桃

海上蟠桃樹三山相護遮長空一萬里縹緲見明霞  
仙臺青鳥使飛入丈人家爲報成甘實春風幾度花

南山橋梓

相彼橋與梓翼翼排青嶂根株連密奧枝葉亦相向  
草木抱良知宛有天倫狀至哉商子言三復起清唱

柏鹿

昂藏雪色鹿野性不受羈下踏瓊瑤草仰啖松柏枝  
四明有仙客乘之遊海湄桂花三度發曾味鹿鳴詩

題菜花圖

青皇奢物華春色恣拋擲野圃被光榮爛熳蝶蜂日  
畫圖霜霰邊秋懷亦蕭瑟醒我少年夢浪揮吐花筆

挽劉封君友桂

尚寶卿  
乾之父

憶昔廿載前曾訪桂軒下桂枝始含英轉眼陰蔽廈  
兩授大夫封光輝照綠野逍遙金陵仙嬰鑠丹陽馬  
一夕夢天遊哀悼盈都社我忝賢郎知此情無由瀉  
悵望桂花軒西風一瀟洒桂枝餘天香應有繼芳者



挽詩

看君墓上碑若識平生面精金出昆吾堅剛經百鍊  
文章科第才勳業循良傳擊劍爲君歌青天雨霜霰  
一齋

緣知一齋意乃在天地先克一典謨訓抱一道德篇  
大分齋鵬鷗至理忘愚賢坐解梅花數中霄片月團  
橫塘書屋爲歛人鮑漳監生題

堂樾山水奇橫堂讀書處好風生新涼殘月送清曙  
采采芙蓉花翩翩鳳凰翥念昔作室心朝夕毋遊豫  
挽秦翁

市隱有斯人我來人已逝湖海識佳名鄉邦談義事  
墓表欲輝山劍歌空砢地天將啓後芳偉爾青雲器

挽秦母

淮水曾澄清淑人生水曲賢嗣茂芝蘭懿德比金玉  
雞鳴想寒機烏啼繞殘燭猶遺剪髮風我來蒙館穀  
恆齋

齋以恆爲名恆乃士之守巫醫不可無天地所以久  
盛德未易窺存心良亦厚雲雨翻覆場見此江湖友

寄贈胡希忠子庭懋

故人有佳兒石老稱不已起家明一經尋友輕千里



衣冠胡氏風燈火蘇門雨老眼注青天瞻爾振儀羽  
郊野春耕

水蒲初生葉水荇初開花布谷樹頭鳴春事到農家  
黃犢新試犁黑雲翻汗邪今年公役均縣尹令不譁  
四境樂無虞賦不及牛車所以得治私處處比桑麻  
梅花

梅花不負我歸來花更繁橫枝夾青竹枝枝向我軒  
舊詩猶在卷新酒欲盈樽與汝歲寒意相看各不言

題萱草圖

詩人味此花云是忘憂草君子愛母心託以昭孝道

朝以沐和風晝以曝晴昊萱葉比年芳萱花照顏好  
萱草花煌煌君子心皎皎

雙松圖

雙樹何青青交枝復連幹用爲棟梁材採作神仙飯  
紫雲倚而奇白石同不爛清歌入畫圖華堂日初晏

題一泓四景

濯纓動月

明月照流水桂影浸孳孳皎皎湛寒碧發我濯纓歌  
一濯破淨練再濯翻金波波面微颺生素手弄銀河  
洗硯生雲



清波白石磯羲之洗硯處  
纖墨點晴空浮雲旋敷布  
聚若疊峰巒散若飄風樹  
翻影黑蟠中怪龍縮角據  
枕流洗耳

流泉過我檻浪浪復湯湯  
淡然素秋夕落木搖清霜  
倚枕洗其耳彷彿箕山陽  
從此謝世語不蹈喧嘈場

掬漪嗽酣

李白夢初醒餘酣猶未消  
侵晨向石泓掬水嗽瓊瑤  
一清欲徹骨兩腋風飄飄  
聊以適我意不負顏氏瓢

贈潘大巡代作

我本塗泥子屈曲在舊蟠  
茲蒙天人力提上青雲端

飲我玉池水濯以清泠湍  
授以風雲術俟時生羽翰  
天人忽遠去長望路漫漫  
海嶽瞻儀宇聲名北斗間  
清響遺巖壑恍若吟鳳鸞  
守茲指南轍遠到良不難

又代作一首

浩浩淞江汜鬱鬱萬松岑  
雨露何汪濺風霜何蕭森  
風霜君子威雨露君子心  
小子恒仰止會萃如嘉林  
朝以采其花暮以依其陰  
天風振逸響茲調傳瑟琴  
大雅奏明堂願爲鸞鳳吟

沛公號曾惠題贈

龍山一片雲鬱而未能南  
長護卧龍身石陰雲之處



天風忽飄飄清陰解煩暑桔槔或廢力吾施亦易爾  
吾觀世結茅牽掣何日已禪學承遠流不爲形骸使  
苟得吾所悟亦有洒然舉一洗炎埃空不亦雨祈縷  
人號曰曾惠達之豈過許

月川

我觀月川圖乃知幽人心山中有真境夜半成浮陰  
褰裳登彼岸援琴瀉流音白鶴一聲曉恍然何處尋

湖南

結屋抱湖曲湖光清滿屋日出踏湖隄情與魚鳥熟  
涼颺拂芙蓉寒波淡醺醪積雪不可行下塘騎黃犢

洗心

心從天地來何乃待於洗物欲如塵泥生後乃洗耳  
有覺忽惻然洗之一念始且論洗之方先取元氣水  
敬如一寸膠投水清見底還借成湯盤復沾孔時雨  
澡淪方寸間至寶出泥滓此方自古傳吾乃重煩語  
怠忘或人情不警心終死再爲君申言日新莫自己

富陽道中

扁舟下桐江江水逾浩蕩雲霞石屋深波濤海門壯  
神魚挾我舟高駕千重浪三山若可尋群仙渺相望  
望雲思親爲中書王子昭賦



杲杲燕臺日灼灼瑤池花懷人心萬里遠望赤城霞  
山川盡雲物魚鴈渺天涯他年衣錦子四馬送歸車  
夜坐

虛堂暑氣薄屋角南風流濯髮倚庭榭爽氣近新秋  
飛高螢火細宿穩鵲巢幽湖海茫茫去空懷范蠡舟  
棠影移簾

愴悌有君子日落棠樹下棠影簾前移白日度長夏  
吏散琴書靜棠樹只繫馬嗟嗟乎棠兮剪伐何不可  
剪伐何不可敢忘棠下坐

紫竹

紫竹昔年種歸來秀滿亭飽經霜與雪秋色掃蒼溟  
挺挺抱風槩娟娟養性靈釣鰲竿已具眼底付趨庭

竹隱

竹可比君子託以怡隱心風霜見高節琴瑟瀉餘音  
明月虛入戶白雲低結林長掩水西扉俗駕無由尋  
南垣爲克垂題

南城垣半頽雲盡漏江月喜君屋簷破月色爛如雪  
靜坐玩九疇案上洛書列呼子擁膝前一爲之說  
南垣莫  
我伐南垣莫樹旗旗竿願風折  
江月願長同照我心皎潔



心漁爲錢公題

身居茅屋下夢落白石灣六物夙已具釣鰲誠不難  
出身犯世路風波涉其端得魚意已淺忘魚神乃全  
昔有直鉤者游心長逝川撫弄無絃琴暗與風雅關  
得理不假物興滿天地閒白日老心漁此心已悠然  
賀石山翁

先生環偉才抑之不盡用老根發餘枝無乃天所縱  
前年採其一磊砢已驚衆今年採其一娟脩復端重  
足以作舟楫足以作梁棟明堂廣構聚轉展羣力送  
小者載專車大者九牛共猶有未轉者羣力拽不動

君家如鄧林叢生內不空其陰蟠蛟螭其陽止鸞鳳  
疊秀擁後先並美排伯仲禮義懋籓籬詩書厚培擁  
根株堅且良先生德所種

春風追慕爲廣西馮主事士立題

潛陽回厚地輕颺散繁陰百卉揚榮輝皇皇耀華林  
旭日照芳樹上有子母禽母鳴子和之物類同至音  
君子抱怵惕感慕激中忱寂寞萱花影涕淚交沾襟  
三春不可再窮比寸草心榮輝旣以被雨露涵濡深  
形容縵圖畫哀思絕素琴遙念躑躅地誦我春風吟

楚令母挽辭二章



阿母爲荆山君侯荆山玉高價博連城光輝始離璞  
君侯作霖雨阿母是雲谷雲谷氣神靈霖雨沾濡足  
君侯多善政咸云母遺福清霜凋萱花屋角號風木  
聲斷南薰絃淚溼斑衣服傷哉君侯心乃動盈途哭  
哭爲君侯去善政無久牧

二

板輿赴姚江花滿河陽似但看姚江花但飲姚江水  
嘗言消息好屢有平反喜西風吹白楊夢斷姚江雨  
遙遙萬里魂故鄉乃安處

雪山

我愛雪中山日華清且麗烟雲淡生姿靄靄浮佳氣  
松柏見餘情蒼翠轉凌厲怡我歲寒心日午凭欄地

友蓮

結交有蓮花盈盈一水隔薰風送香氣坐識君消息  
月下湛容光對之未佳夕忽焉啓我心中通而外直  
我詩儀型之出水去雕飾交道混聲利於君望三益  
爲陸道川謝洪別駕

寒士蒙垂青飲德江河足枯朽揚春輝泥塗出清浴  
折節白屋榮轉眼蒼生福我詞比木桃聊以答瓊玉

潤齋



潤乃身之滋厥脩來乃繼仰吞雲漢精俯吸江河氣  
抱真養自完居卑澤未試庭前雙桂花變理多生意

末思

俯仰天壤閒悠悠思無極野草三春暉風木五更泣  
斑斕慘舞衣夢寐見顏色蓼莪篇不廢燈光淡寒夕

後溪

結屋枕後溪溪流不息秋意送溪聲蕭瑟繞四壁  
梅花夢初醒萬山溪月白飄風起天末溪聲度危石  
餘韻落枕邊心魂與之適乾坤活潑機翻然悟周易

希古篇

皇皇去日遙大旨度逾午巧機聿以生世道漸不古  
舊軌不可尋荆棘阻其武古道在人心有覺自還覩  
循此充其端煩文謝織組希古先求音溫淡吾自取  
撫弄不絃琴復玩無字譜象數遂昭然道德有宗祖  
抱樸天壤閒昧者嗤迂腐

松谷爲虞畫師賦

若人愛松谷飽餐清虛氣雲雨起松根變化乃初試  
解此觀世紛朗然道者意盈虧消息機播弄玩爲戲  
胸中一點靈筆底天然勢乘興一揮洒逞爾神仙技  
萬象開渾茫妙手闢天地



恤孤篇

傷哉丹鳳雛嗷嗷失其怙王母見之憐惻惻頻盼顧  
攜上崑崙顛百鳥還回護餌以玉禾粒飲以金莖露  
肅肅羽毛齊翩翩起雲霧迴翔天目趾佳音五雲度  
側翅望瑤峰永隔登遐路空銜三花草悲鳴繞其樹

荒野鳥

能返哺

松雲

青山一片雲徘徊古松畔春雨助元功夏峰點奇觀  
變化龍是從瀟散鶴爲伴儼然梁棟姿過者瞻天漢

贈觀瀾居士

川流浩無息旋波有餘勁清飈微播揚迴紋被澄淨  
鴛鴦戲漣漪蘋藻相輝映變態觸物生遇險出奇競  
乃知自然文源深而氣盛孔子川上歎於穆天之命  
觀瀾發子輿因以窺真靜人心活潑機一私多自病  
君子重自省夙夜存畏敬所以生色餘粹益其文炳  
西白爲唐子潛題

山人住西白頗得山中意往來猿雀踪呼吸雲霞氣  
古樹有三花古書無一字指點世人迷聊以餘緒試  
冰蘖爲星瞽賦

齧冰復齧蘖清苦乃自試重滌雪霜操陰滋茶蓼味



炎蒸毒潛消肥甘穢遠退治瞽先治心化原識幽秘

贈徽州吳柳田

有客來訪我文采何翩翩扣之若金石至音太古前  
至寶混燕石利器抱龍泉細雨姚江道綠楊書畫船

種玉

君有種玉方我有種德術方術兩奇妙種玉先種德  
方寸地本良春意恆惻惻仁乃德之根培擁善是力  
一念妒忌私易爲根之蝕耘鋤功不替廓然無茅塞  
天源一派澄灌溉日加益厥德茂而成瓊芽日生息  
葉葉流光輝玉立紛秀特

東 小精舍四首

野有蟠龍塘中有臥龍崗其人抱隱德風雲鬱以蒼  
文章炳不掩乃見少微光慙慙孫學士日日送壺觴

二

去海只百里坐觀海色高長風送鯨韻倚枕聽波濤  
吟哦不自己聊以弄風騷功名空眼底鄉里見兒曹

三

斯人廬故墓涕淚著松樹松樹復自榮白兔守其處  
女蘿上盤結琥珀下乃據諷誦蓼莪篇燈夕茅茨度

四



聞有朱山人讀書破萬卷偶爾論世事一一的受箭  
滾滾口懸河煌煌眼飛電姚江倪小野當作處士傳

愛桂挽詞

愛桂人已亡桂花依舊發舞影何蒼茫吟魂正蕭颯  
不見白鶴歸已負赤松約月明鳳凰啼繞樹還三匝

題平湖陸元輔伍塘卷

伍塘愷悌士厥號抒素情區區伯威末曷足求其名  
胥峰光祿墓天恩昭上卿瞻望已不遠源流伍塘經  
風雨停扁舟蓼莪誦深更殘月憶高堂彷彿雞初鳴  
平生過庭夢此地轉分明三春一寸心塘草年年生

我昔在兵曹畏僚結伊兄因拜光祿公陸家玉樹榮  
伍塘朗眉目氣凌秋昊清別後二十載事業何崢嶸  
今觀五塘卷感慕賢孝聲

題閩人元魁母徐孺人

瑤水有源流嘉穀宜碩茂澗澗正中流春霖發天秀  
傷哉徐孺人裔出名家舊賢名蚤見揚未得享榮壽  
尊卑內外并家道方盈盈一身任衆責所係良非輕  
甘旨願未畢詩書訓獨明婦人心無他豈願身後名  
伊翁我所友伊子我所與德範耿耿在我聞亦已屢  
襲桂清江族門牆轉高趾落落公論昭我詩紀厥始



亦泉

門有白雲泉清冷下絕巘試味頗辨真求源亦不遠  
青郊作春霖赤日救夏旱滾滾大江流蓮葉船正穩  
飛來峰

湖上飛來峰不知是何年星宿移鰲背風雨帶龍涎  
曾卓誌公錫不受秦王鞭未須論幻事聊以寄吾禪

秋香玉兔圖

山中桂花發白兔守其根明月在天上清光任吐吞  
是豈漢莽物乃是明月魂白晝歸天室不見雪霜痕  
蒼鷹反樞恐秋景滿乾坤

樂山

仁者乃樂山樂山本其性氣吐雲雨奇脈流湖海應  
朝觀典與飛夜聽心逾靜肺腑重罨幽膏肓泉石病  
聞君知所希百慮從茲定

題猫

文具玳瑁理睛耀琥珀光葺爾門庭虎殺聲挾秋霜  
盆甕夜來穩主人清夢長春風日正午雄踞蘭花傍

題施翁終慕卷

施翁居城市其心抱朴醇吾舊托戚鄰吾故知之真  
羣賢贈終慕一一吾能陳憶昔親在堂經營任其勤



娶婦賢而孝供職惟昏晨衣食謀稍理處困頗得伸  
高堂相繼逝念念思雙親舊事不脫口逢人語諄諄  
開口淚盈眼其語嗟歎頻嗟歎復嗟歎涕淚垂沾巾  
乳哺若離抱提攜若離身感觸人至性聽者多悲辛  
茲乃吾親見年歲今八旬此心老若少而不閒富貧  
搖筆敢夸耀所以明人倫

過韋德容宅題柑

此菓當薦上九珍不足數栽植茲圃中主人同出處  
相之在我傍漫賦方羨汝汝本瓊玉姿如何雜凡卉  
清霜雖未經幾度凌風雨他日登瑛盤乃釀黃金乳

偶賦二首

謝病長閉門老衰百欲退年少讀書心洒然未受穢  
所見清益明坐處炳萬類始覺世人情一一多悖戾  
何必論膝前空自吐肝肺所以商伊尹如覺呼其寐  
可由不可知聖人原有誨

二

緬思天下人有暗而有明暗衆而明寡乃是天所生  
暗者不自知明者通人情明者在上位所以天下平  
暗者或在上相率亂天經唐虞與桀紂由此分渭涇  
反觀一家內由此分立傾明暗推其由只在聽不聽



觀書

粵若稽古聖仰觀而俯察倫物具精粗一一炳灼  
然後筆爲書所以代口舌豈徒覺一世垂後啓明哲  
仲尼正五經掃除丘與索如何傳種遠根株太繁蘖  
但求文字中反求功蕩滅白頭費精神鑿壁虛映雪  
仰彼陋巷賢心齋是真訣莫訝焚書王所欠玉石別

石泉爲衢州杜翁題

泉爲水之源石爲山之體體立用斯昭源濬流不已  
源流體用閒其妙具諸己人苟能察之念念體物理  
相彼泉石翁於焉得所止嘉樹蔭其顛神物潛其底

紛華謝冠裳塵埃隔城市暘谷候春溫陰崖避炎暑  
白晝弄雲日清秋聽風雨烟霞抱古心猿鶴呼仙侶  
枕泉以洗耳漱石乃礪齒洗耳廣聽聞礪齒潔言語  
所好肺腑閒厥癖膏肓裏樂壽成其終動靜驗諸始  
始終諒無愆勉哉杜君子

巫山神女圖

巫山有神女十二峰模糊爲雲又爲雨倏有而倏無  
意態春空滿姿容新月孤造化亦何意神仙本涉虛  
塵夢旣以妄文藻成其誣私邪附丹青至今傳畫圖

湘妃泣竹圖



君心爲天下憶君二妃心南巡不復返望斷蒼梧陰  
鳳凰候翠華薰風想鳴琴雲重不可見駐輦湘水潯  
日暮思無極淚下溼羅襟飄洒沾江竹闌闌淚痕深  
幾度經風雨末代難消沉至誠動天地可貫石與金  
況復聖過化古蹟寒蕭森



